



Broj:  
Sarajevo, 18.3.2014.

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

PRIMLJENO:	18.3.2014.		
Organizaciona jedinica	Klasifikaciona oznaka	Redni broj	Broj priloga
01-02-1-11/14			

**PARLAMENTARNA SKUPŠTINA BOSNE I HERCEGOVINE  
PREDSTAVNIČKI DOM**

n/r Milorada Živkovića, predsjedavajućeg

**Predmet: Prijedlog zakona o dopuni Krivičnog zakona Bosne i Hercegovine**

Na osnovu čl. 99. i 100. Poslovnika Predstavničkog doma Parlamentarne skupštine BiH („Službeni glasnik BiH“, br. 33/06, 41/06, 81/06, 91/06, 91/07, 87/09 i 28/12), kao ovlašteni predlagač dostavljam **Prijedlog zakona o dopuni Krivičnog zakona Bosne i Hercegovine** radi razmatranja i usvajanja u Parlamentarnoj skupštini BiH.

Predlažem da se procedura razmatranja i usvajanja ovog prijedloga zakona provede po redovnom zakonodavnom postupku.

U prilogu dostavljam tekst Prijedloga zakona s obrazloženjem na bosanskom jeziku i elektronsku verziju Prijedloga zakona.

S poštovanjem,

Poslanik SDPBiH  
  
dr. sc. Denis Bećirović

Na osnovu člana IV.4.a) Ustava Bosne i Hercegovine, Parlamentarna skupština Bosne i Hercegovine, na \_\_. sjednici Predstavničkog doma, održanoj \_\_\_\_\_ 2014. godine, i na \_\_. sjednici Doma naroda, održanoj \_\_\_\_\_ 2014. godine, usvojila je

**Z A K O N**  
**O DOPUNI KRIVIČNOG ZAKONA BOSNE I HERCEGOVINE**

**Član 1.**

U Krivičnom zakonu Bosne i Hercegovine („Službeni glasnik BiH“, br. 03/03, 32/03, 37/03, 54/04, 61/04, 30/05, 53/06, 55/06, 32/07 i 8/10) iza XXII. GLAVE dodaje se XXIIA. GLAVA koja glasi:

**„XXIIA. GLAVA DVADESET I DRUGA A**

**DJELOVANJE I OSNIVANJE FAŠISTIČKIH I NEOFAŠISTIČKIH ORGANIZACIJA,  
UPOTREBA FAŠISTIČKIH I NEOFAŠISTIČKIH SIMBOLA**

**Član 250a.**

(1) Ko osnuje ili uspostavi fašističku ili neofašističku organizaciju, udruženje, političku stranku ili grupu koja promovira ideje i doktrine koje su fašističke, rasističke ili ksenofobične i koje u svom nazivu imaju simbole ili oznake koje su historijski potvrđene kao fašističke ili neofašističke, ili koriste bilo koje druge simbole kojima se širi mržnja ili poziva na uništenje ili istrebljenje nekog naroda, rase, etničke ili manjinske grupe,

kaznit će se kaznom zatvora od jedne do pet godina.

(2) Službeno lice koje omogući registraciju organizacije, udruženja, političke stranke ili grupe iz stava (1) ovog člana,

kaznit će se novčanom kaznom ili kaznom zatvora do tri godine.

(3) Ko postane pripadnik organizacije ili grupe iz stava (1) ovog člana ili na drugi način pomaže organizaciju ili grupu iz stava (1) ovog člana,

kaznit će se kaznom zatvora od šest mjeseci do tri godine.

(4) Ko organizira okupljanje pripadnika fašističke organizacije, udruženja, političke stranke ili grupe iz stava (1) ovog člana,

kaznit će se kaznom zatvora od jedne do pet godina.

(5) Ko na javnom mjestu ističe simbole koji predstavljaju ili su tipični za fašističke i neofašističke organizacije iz stava (1) ovog člana ili ko ističe predmete s likom počinitelaca ratnih zločina ili

zločina protiv čovječnosti, ili ko izvodi pjesme koje u tekstu spominju i veličaju fašističke ili neofašističke organizacije, njihove vođe i simbole,

kaznit će se novčanom kaznom ili kaznom zatvora do tri godine.

(6) Ko stavi na raspolaganje prostoriju da se u njoj proizvodi, skladišti ili umnožava bilo kakav materijal za organizacije iz stava (1) ovog člana,

kaznit će se novčanom kaznom ili kaznom zatvora do tri godine.

(7) Ko proizvodi, izrađuje, prodaje ili besplatno dijeli predmete sa simbolima fašističkih i neofašističkih organizacija iz stava (1) ovog člana ili s likom počinitelaca ratnih zločina ili zločina protiv čovječnosti,

kaznit će se novčanom kaznom ili kaznom zatvora do tri godine.

(8) Ko na sportskom takmičenju koristi simbole fašističkih i neofašističkih organizacija iz stava (1) ovog člana, koristi transparente ili izgovara parole koje izazivaju netrpeljivost, mržnju i strah tokom sportskog takmičenja,

kaznit će se novčanom kaznom ili kaznom zatvora do tri godine.“

## Član 2.

Ovaj zakon stupa na snagu osmog dana od dana objavljivanja u „Službenom glasniku BiH“.

PSBiH, broj \_\_\_\_\_ / \_\_\_\_\_

\_\_\_\_\_  
Sarajevo

Predsjedavajući  
Predstavničkog doma  
Parlamentarne skupštine BiH  
dr. Milorad Živković

Predsjedavajući  
Doma naroda  
Parlamentarne skupštine BiH  
dr. Dragan Čović

## OBRAZLOŽENJE

### I. USTAVNOPRAVNI OSNOV

Ustavnopravni osnov za donošenje ovog zakona sadržan je u članu IV.4.a) Ustava BiH. On je nesporan, jer je riječ o dopuni postojećeg Krivičnog zakona BiH.

### II. RAZLOZI ZA DONOŠENJE

Trenutno ne postoji pravni način za krivično gonjenje fašističkih organizacija koje, stoga, imaju slobodu da šire svoje ideologije. Pod fašističkom organizacijom obično podrazumijevamo one grupe čiji je cilj uspostavljanje režima s fašističkom ideologijom na štetu demokratskih institucija. Ovaj nedostatak pravnih propisa daje poruku o nekažnjivosti, koju čak i institucije prešutno podržavaju. Zato je ova pravna inicijativa važna, jer osigurava snažan izraz društvene osude određenog ponašanja i grupa koje ga podržavaju.

### III. OBRAZLOŽENJE PONUĐENIH RJEŠENJA

Ovim prijedlogom zakona propisuju se kazne za osnivače fašističkih organizacija, pripadnike, ali i za službena lica koja dozvole registraciju ovakvih organizacija. Također, predviđene su kazne za isticanje fašističkih simbola na javnim mjestima, a posebno se predviđa kažnjavanje za isticanje fašističkih simbola, transparenta i pjevanje fašističkih pjesama na sportskim takmičenjima, jer je poznato da se baš na sportskim terenima događa da se vide svi ovi simboli na jednom mjestu. Fašistički simboli koji prikazuju počiniocima ratnih zločina i zločina protiv čovječnosti također se zabranjuju ovim zakonom zato što fašističke organizacije često koriste slike poznatih ratnih zločinaca u svrhu propagande ili zastrašivanja, s obzirom da oni simboliziraju borbu za prevlast jedne nacionalne, vjerske ili etničke grupe nad drugom.

### IV. FINANSIJSKA SREDSTVA

Za provođenje ovog zakona nije potrebno osigurati dodatna finansijska sredstva u budžetu institucija Bosne i Hercegovine.